

V E N D I M
Nr.405, datë 24.6.1998

PËR LEHTËSIMIN E PAPUNËSISË NËPËRMJET ZBATIMIT TË PROGRAMIT TË PUNËVE PUBLIKE

Në mbështetje të ligjit nr.7933, datë 17.5.1995 “Për punët publike”, me propozimin e Ministrisë së Punës dhe Çështjeve Sociale, Këshilli Ministrave

V E N D O S I:

1. Qëllimi i zbatimit të programit të punëve publike është:
 - a) lehtësimi i papunësisë dhe i varfërisë në njësitë administrative lokale më problematike;
 - b) rritja e efektit dhe reduktimi i kostos së programeve shtetërore të mbështetjes me të ardhura;
 - c) përmirësimi i infrastrukturës dhe i kushteve të jetesës në njësitë administrative lokale;
 - d) rritja e mundësive për veprimtarinë ekonomike dhe për zhvillimin në njësitë administrative lokale;
 - e) mbështetja e veprimtarisë së organeve të pushtetit lokal.
2. Objekti i projekteve të punëve publike është:
 - a) ndërtimi, rikonstruksioni, riparimi, sistemimi dhe mirëmbajtja e elementeve të thjeshta të infrastrukturës;
 - b) krijimi, përmirësimi ose riparimi i mjediseve publike në qendra të banuara.
3. Shërbimi kombëtar i punësimit organizon, koordinon dhe drejton zbatimin e programit shtetëror të punëve publike.

Ky program kupton financimin, me fonde të buxhetit të shtetit, të veprimtarive që krijojnë vende të përkohshme pune, të thjeshta dhe shoqërisht të dobishme, në njësitë administrative lokale për kategoritë e individëve që përcaktohen në ligj.
4. Zbatimi i këtij programi siguron punësimin nëpërmjet:
 - a) lidhjeve të kontratave me individë për të punuar për zbatimin e projekteve;
 - b) punësimit të përkohshëm në subjekte, që kryejnë veprimtari në fusha me interes të përgjithshëm publik.
5. Kanë të drejtë të aplikojnë për financim ose bashkëfinancim për projekte për punë publike:
 - a) organet e pushtetit lokal;
 - b) organizatat e punëdhënësve dhe të punëmarrësve;
 - c) organizatat joqeveritare, të specializuara në këtë drejtim;
 - d) subjektet ekonomike fitimprurëse, të specializuara në këtë drejtim.
6. Financimi i projekteve aprovet kur:
 - a) garanton respektimin e kërkesave të ligjit “Për punët publike”, të këtij vendimi dhe i të drejtave të tjera të punëmarrësve, sipas legjislacionit në fuqi;
 - b) objekti i zbatimit të projektit sjell përfitim publik të drejtpërdrejtë për njësinë administrative lokale;
 - c) niveli i regjistruar i papunësisë në rreth është më i madh se 8 për qind i fuqisë së aftë për punë, ose numri i përfituesve të ndihmës ekonomike është të paktën 5 për qind e popullsisë së njësisë administrative lokale (bashkisë ose komunës);

d) të paktën 50 për qind e atyre që janë marrë me kontratë janë përfitues nga programet shtetërore të mbështetjes me të ardhura ose të papunë afatgjatë;

e) 60 për qind e financimit të kërkuar nga ky program përdoret për fuqi punëtore;

f) kohëzgjatja e punimeve për zbatimin e projektit është jo më e madhe se 6 muaj;

g) sigurohet të paktën 5 për qind kontribut i jashtëm financiar ose në natyrë;

h) të jetë i hartuar nga persona të autorizuar.

7. Subjektet fitimprurëse, përfitojnë financim për projekte, të cilat do të zbatohen nga ata, vetëm në rastet kur, përveç plotësimit të kriterëve të përcaktuara në pikën 6 të këtij vendimi, realizohen dhe:

a) fitimi i subjektit nuk është më i madh se 15 për qind e kostos që shpenzohet për fuqi punëtore;

b) garantohet zbatimi i projekteve me një shumë të paktën sa 10 për qind e kostos së preventivuar të projektit.

8. Kanë të drejtë të aplikojnë, për mbulimin e kostos për punësim të përkohshëm:

a) njësitë ekonomike në vartësi të pushtetit lokal dhe institucionet shtetërore që kryejnë shërbime publike;

b) subjektet jofitimprurëse.

9. Një aplikim për financimin e punësimit të përkohshëm në subjekte aprovohet kur:

a) garantohet respektimi i kërkesave të ligjit “Për punët publike” të këtij vendimi dhe i të drejtave të tjera të punëmarrësve, sipas legjislacionit në fuqi;

b) punësimi i kërkuar u sjell përfitim të drejtpërdrejtë shërbimeve publike dhe interesave të njësive administrative lokale;

c) kohëzgjatja e angazhimit të punës është jo më e madhe se 6 muaj;

d) kontribuohet në para, ose në natyrë, nga burime të tjera të paktën me 5 për qind të masës së financimit të kërkuar.

10. Për mbulimin e kostos të fuqisë punëtore të punësuar, sipas këtij programi, fondet e Buxhetit të Shtetit financojnë:

a) jo më tepër se 110 për qind të pagës minimale për mbulimin e shpenzimeve për paga;

b) 100 për qind të shpenzimeve për mbulimin e kostos së kontributeve të punëdhënësit për sigurime shoqërore të detyrueshme.

11. Vëllimi i punës që ngarkohen të kryejnë personat e angazhuar me punë nga ky program nuk mund të jetë më i madh sesa ai që i përgjigjet pagës që u jepet për këtë qëllim.

12. Çmimet për vëllim punonjësi përcaktohen sipas një mesatareje, në bazë rrethi, e cila duhet të jetë aprovuar më parë nga Komiteti Shtetëror i Punëve Publike.

13. Aplikimet për financime nga ky program i paraqiten zyrës kompetente të punësimit, e cila bën verifikimin dhe klasifikimin e tyre në përputhje me kriteret.

Zyra kompetente e punësimit është përgjegjëse për kontrollin e ecurisë së zbatimit të projektit ose të punësimit të financuar. Zyra e punësimit punëson me kontratë personel teknik dhe pajis me logjistikën e duhur për kryerjen e funksioneve që u ngarkohen.

14. Për propozimet me kosto të preventivuar nën 2 milionë lekë, vendimi merret nga zyra përkatëse e punësimit. Për propozimet me vlerë deri në 5 milionë lekë, vendimi merret nga komisioni i posaçëm që krijohet pranë Shërbimit Kombëtar të Punësimit. Për propozimet mbi 5 milionë lekë, vendimi merret nga Komiteti Shtetëror i Punëve Publike. Sasia e fondit të vënë në dispozicion të çdo rrethi nga ky program vendoset nga Komiteti Shtetëror i Punëve Publike, me propozimin e Shërbimit Kombëtar të Punësimit.

15. Shërbimi Kombëtar i Punësimit dhe organet e pushtetit lokal organizojnë kontrollin

dhe inspektimin e veprimtarisë, në zbatim të këtij programi dhe të subjekteve që përfitojnë financime nga ky program.

16. Ngarkohen Ministria e Financave dhe Ministria e Punës dhe Çështjeve Sociale të nxjerrin udhëzimin e përbashkët për përcaktimin e procedurave për përdorimin e fondeve për punët publike.

17. Për kriteret e përcaktuara në pikat 6, 7 dhe 9 të këtij vendimi mund të bëhen përjashtime vetëm me vendim të Komisionit Shtetëror të Punëve Publike.

18. Ngarkohet Ministri i Punës dhe Çështjeve Sociale të nxjerrë udhëzimet përkatëse për zbatimin e këtij vendimi.

19. Pikat 1,2,3,4,5,6,7,8,9,10,11,12,13 të vendimit të Këshillit të Ministrave, nr.563, datë 9.10.1995 “Për aplikimin e punëve publike”, ndryshuar me vendimin nr.179, datë 18.3.1996 të Këshillit të Ministrave, vendimin nr.857, datë 16.12.1996 të Këshillit të Ministrave dhe vendimin nr.175, datë 6.3.1998 të Këshillit të Ministrave, shfuqizohen.

Ky vendim hyn në fuqi menjëherë.

KRYEMINISTRI
Fatos Nano